

**TUSI TA'IALA POO LE  
FUAFUAGA TATAU  
MO LE VA'AIA LELEI O I'A MA FIGOTA  
O LE AFIO'AGA  
O**



**SAUNIA:**

Pule mamalu a Alii ma Faipule ma tagatanu'u o Matatufu faatasi ma le lagolagosua a le Vaega o Faigafaiva a le Matagaluega o Faatoaga ma Faigafaiva.

**PASIA ALOAIA : *ASO 22 FEPUARI 2007***

# **FA'ALUPEGA O LE AFIO'AGA**

Afio Alalamaota ma Usoalii  
Alalatai le Falefa o Saleapaga ma Ituala  
ma Faatili o le Aliimau Faleupolu

# TUSI TAIALA

(FUAFUAGA TATAU MO LE VAAIA LELEI O I'A MA FIGOTA)

## FAASOLOGA

1	Faatomuaga	4
2	Autu (Faamoemoe o le Tusi Taiala)	4
3	Ituaiga Faigafaiva Ta'atele	6
4	Tulafono faa-le-nuu e fesootai ma le siosiomaga o le gataifale o Matatufu	6
5	Tapenaga o lenei Fuafuaga Tatau (Tusi Taiala)	7
	5.1 Feiloaiga muamua ma le uluai fonu ma le afioaga	7
	5.2 Faatalatalanoaga ma Vaega Taitasi o le Afioaga	7
	5.3 Komiti Faufautua mo le Vaaia Lelei o I'a ma Figota (KFVL)	8
6	Pasiaina o le Fuafuaga Tatau mo le Vaaia Lelei o I'a ma Figota	8
	6.1 Fuafuaga Tatau mo le Vaaia Lelei o I'a ma Figota ma le tauaofiaga o le Fono Mulimuli	8
7	Fuafuaga Faataatitia	9
	7.1 Faasaina faigafaiva le talafeagai	9
	7.2 Faasaina le fagotaina o i'a ma figota laiti	10
	7.3 Faasao o le gataifale	11
	7.4 Faasaina lama moli uila	12
	7.5 Faasaina faigafaiva mai i isi afioaga	12
	7.6 Faasaina le lauina o le oneone	13
	7.7 Faasaoina o togotogo	13
	7.8 Iloiloina le tulaga talafeagai o le gataifale mo le tufaina o figota ma i'a	14
	7.9 Ia faaaogaina le mana o talosaga	15
	7.10 Talosaga	15
	7.11 Maliliega	15
	7.12 Toe iloiloina o le Tusi Taiala	16
	7.13 Upu mulimuli	16
8	Faamatalaga e uiga i le afioaga	17
9	Ituaiga Faigafaiva e faatinoina i aso uma	18
10	I'a ma Figota	19
11	Tulafono a le afioaga i le puipuiga o le gataifale	20
12	Faamatalaga ma faamaumauga sa aoina i taimi o faatalatalanoaga	21
13	Faamatalaga o sui o le afioaga sa auai i le faatalatalanoaga	23

## 1 Fa'atomuaga

O faigafaiva i Samoa e taua tele aua o se tasi lea o auala e maua ai le fofoga taumafa aemaise lava i nu'u ma afio'aga i tua. I le tele o afio'aga, latou te le o fa'atauaina le va'aia lelei o le tamaoaga ma le si'osi'omaga o le gataifale. O le aumaia ma le fa'aaogaina o ituaiga faigafaiva faa-onapo nei e i ai mea manava, upega/tili mataninii, ma vaila'au 'oona e fa'amata faigofie ai ma tele i'a maua ae o lo o fa'atama'ia ai le si'osi'omaga o le gataifale ma ona tamaoaga. O le fa'atinoina foi o atina'e i luga o le gataifale ua fa'aleagaina ai le tele o nofoaga ma le miliona o meaola o loo nonofo ma tautuuufua ai. E le gata i lea, ao aafiaga mai mala faa-natura e pei o afa ma matagi malolosi ua tuanai.

Ina ia fa'asaoina mai i lea tulaga, ua fa'atuina ai e le Vaega o Faigafaiva o le Matagaluega o Faatoaga ma Faigafaiva se Polokalame mo le Pulega o le Si'osi'omaga o le Gataifale, ma le Vaa'ia lelei o i'a ma figota, ina ia fesoasoani i le fausiaina o se Pulega faa-faigafaiva i nu'u ma afio'aga e fa'asao, pulea ma fuafua tatau le faaogaina o le tamaoaga o le gataifale o Samoa.



*O se vaaiga matagofie lena i le gataifale ma le vai o le Afioaga*

O lenei fuafuaga tatau mo le va'aia ma le tausia lelei o i'a ma figota sa saunia e le Pule mamalu a Alii ma Faipule ma tagatanu'u o le afio'aga o Matatufu faatasi ai ma le lagolagosua a le Vaega o Faigafaiva.

## 2 Autu.

O le autu sa fa'atalatalanoaina ma malilie autasi ai le Pule mamalu a Alii ma Faipule faatasi ma le Komiti a Tina o le Afio'aga o Matatufu i taimi o faatalatalanoaga o le ;

***“Puipuiga o le Siosiomaga o le Gataifale ma le toe faatupulaia o i'a ma figota mo tupulaga ole lumanai”***

### **Faamatalaga e uiga i le Afio'aga.**

O le Afio'aga o Matatufu e i le itu i saute i sasae o le motu o Upolu ma o lona faitauaofai e tusa ma le 700 aofia ai Matai, Tina ma Tamaitai, Aumaga ma alo ma fanau. E le o aofia ai i latou ua faimalaga atu i atunuu i fafo ma aumau ai.

E fa ni tapuaiga i totonu o lenei nuu, e aofia ai;


- **EFKS**
- **Katoliko**
- **Aso Fitu**
- **Faapotopotoga a Le Atua (Assembly of God)**



**EFKS**



**Aso Fitu**



**Katoliko**



**Assembly**

E lua ni aoga i totonu o lenei nuu o loo aoaoina ai alo ma fanau e aofia ai;

### **Aoga Tulaga Lua**

#### **Aoga Faataitai (Pre-School)**



O Matatufu e iai lona aau e mai lava i le itu i sasae seia paia le itu i sisifo i le mamao pe a ma le 150 mita mai le matafaga. O le vaega pito loloto o le aloalo e tusa ma le 6 futu i taimi e sua ai le tai ao nisi pito e 3 futu i le pe o le tai.

### **3 Ituaiga Faigafaiva ta'atele.**

E tele ituaiga faigafaiva e mafai ona faatinoina i le aloalo o le afio'aga o Matatufu. O nisi o nei ituaiga faigafaiva e i ai matatao, tosotoso, ma le faaaogaina o upega (e tele ina faatinoina e alii) mo le fofoga taumafa a le aiga pe faatau foi. O le aoina ma le eliina o figota i luga o le aau o le galuega patino lava lea a tina ma le fanau mo taumafa a le aiga. O le faatinoina o faigafaiva le talafeagai e i ai fanaia ma 'ava niukini ua matua faasaina lava i lalo o le pulega mamalu a Alii ma Faipule e tusa ai ma tulafono a le afioaga ua faamamaluina.

O le tele o i'a sa maua i aso ua mavae ua faigata ona maua i aso nei. O i'a o le aloalo e i ai lo, poge, alogo, ume ma mataleele sa tele ma faigofie ona maua i le 30 tausaga talu ai. E oo foi i figota e i ai le faisua ma sea/loli//fugafuga/mama'o ua tele ni itula e faaalaina i fagotaga faatoa maua se meaai mo le aiga faatusatusa i le 30 tausaga ua mavae.

### **4 Tulafono faa-le-nuu e fesootai ma le siosiomaga o le gataifale o Matatufu.**

O lenei Afio'aga e mamalu tele ona pulega aua e pulea lava e le pule mamalu a Alii ma Faipule. O le aumaga e lava saunia i taimi uma aua le tautuaina o matai, faatasi ma le fautuaga a tina i mataupu tau i loto i fale ole afio'aga.

Sa faaalaina e le Pule mamalu a Alii ma Faipule o loo faaauau pea ona faasaina faigafaiva le talafeagai e pei o fanaia, vailaau oona ma ava niu kini i gataifale o Matatufu e pei ona sau a'i i aso ua mavae. Ua maea foi ona fasalalauina nei tulafono i luga o le alaleo o le 2AP (SBC Radio 1). Ae peitai e le o amanaiaina e nisi o le mamalu o le atunuu nei tulafono.

## 5 Tapenaga o lenei Fuafuaga Tatau (Tusi Taiala)

O lenei tapenaga sa saunia lava e le pule mamalu a Alii ma Faipule, ma tagatanuu o le afio'aga o Matatufu e ala i faamatalaga sa aoaina mai e alii ma tamaitai Ofisa. Sa tuuina atu foi ni fautuaga e le Vaega o Faigafaiva ma tuufaatasia ai loa lenei Tusi Taiala. O se oototoga lenei i le tapenaga o lenei Fuafuaga ina ua maea ni fonotaga sa faia ua taua i lalo.

### 5.1 Feiloaiga muamua ma le uluai fono ma le afio'aga.

I le amataga mai o le polokalame, sa faapea ona sailia e le Ofisa se finagalo o le Pule Mamalu a Alii ma Faipule e faatatau i le plokalamame mo le puipuia o le Gataifale. O le **Aso Lua, 30 Ianuari, 2007** sa faia ai se feiloaiga muamua (fono) a le Ofisa ma le afio'aga e faamalamalama ai le polokalame mo le taliaina e le afio'aga.

Sa taliaina lelei ai e le Afio'aga le Polokalame, ma filifilia ai le **Aso Lua 06 Fepuari 2007** mo faatalatalanoaga ma le Pule mamalu a Alii ma Faipule, Komiti a Tina ma Tamaitai ma Aumaga.



### FEILOAIGA MUAMUA MA LE PULE MAMALU A ALII MA FAIPULE O LE AFIOAGA

### 5.2 Faatalatalanoaga ma Vaega Taitasi o le Afioaga.

O le taua o lenei faatalatalanoaga ina ia vaevaeina le afio'aga i vaega e iai le pule mamalu a Alii ma Faipule, Komiti a Tina ma Tamaitai ma Aumaga. O le autu tonu o nei faatalatalanoaga ina ia mafai e le afio'aga ona faailoa mai faafitauli o lo o alia'e i lo latou gataifale, ma sailia ai ni aafiaga ma ni mafuaaga o nei faafitauli, aemaise o ni fofu, faatinoga ma i latou e faatinoina nei fofu ua ta'ua. O lenei faatalatalanoaga sa faataunuaina lava i le **Aso Lua 06 Fepuari 2007**.



## FAATALATALANOAGA MA VAEGA TAITASI O LE AFIOAGA

### ***5.3 Komiti Faufautua mo le Vaaia Lelei o I'a ma Figota (KFVL)***

O le Komiti leni e filifilia mai lava i vaega sa faatalatalanoaina. O le matafaioi a leni Komiti o le mataituina lea o fuafuaga faataatitia uma aemaise o galuega faatino i le ogasami faasao atoa ma le gataifale. E le gata i lea o taimi e asia ai e le Vaega o Faigafaiva mo le faatinoina o nisi o fuafuaga faataatitia e nafa tonu ma le ofisa, e mafai ai ona faafesootai se sui o leni Komiti pe a tuatuagia le Tofi Pulenuu ina ia silafia e le afio'aga galuega o loo faatinoina i le gataifale aemaise i le ogasami faasao.

O le Komiti foi leni latou te mataituina ma faamalositia tulafono faatasi ma le lagolagosua a le Pule mamalu a Alii ma Faipule, tagatanuu uma ma le Vaega o Faigafaiva. Afai foi ae faia ni aoaoga mo le vaaia lelei o i'a ma figota aemaise lava i figota o loo faa-faatoagaina o le a faapena ona valaaulia mai e le Ofisa ni sui o le Komiti leni e auai ai, ona o i latou ia o loo nafa tonu ma nei matafaioi i le afio'aga.

## **6 Pasiaina o le Fuafuaga Tatau mo le Vaaia Lelei o I'a ma Figota.**

### ***6.1 Fuafuaga Tatau mo le Vaaia Lelei o i'a ma figota ma le tauaofiaga o le Fono Mulimuli.***

O le faagasologa atoa o leni fuafuaga ua tamauina lea i totonu o le Tusi Taiala poo le Fuafuaga Tatau mo le Vaaia Lelei o i'a ma figota. O leni fuafuaga o se maliliega i le va o le afio'aga ma le Malo e tauala mai le lagolagosua a le Vaega o Faigafaiva. O leni fuafuaga sa tuuina aloaia i le fono e sui o le KFVL a'o loo auai ai foi sui o le Pulega a le Vaega o Faigafaiva, e faailoa ai le taua o leni fono. O le fono foi lea e pasia aloaia ai e le Pule mamalu a Alii ma Faipule ma sui o le afio'aga o le a auai ai faatasi ma Alii ma Tamaitai Ofisa a le Vaega o Faigafaiva latou te molimauina leni faamoemoe. O le pasiaaina o leni Tusi Taiala poo le Fuafuaga Tatau mo le vaaia lelei o i'a ma figota e mafai ai e le Afio'aga ma le Vaega o Faigafaiva ona faatinoina galuega ma fuafuaga ua faataatitia.



## **7 Fuafuaga Faataatitia.**

O fuafuaga faataatitia o ni gaiouga ua faamoemoe e faaono foia ai faafitauli ua faaalua mai e vaega eseese o le Afio'aga. E lua (2) ituaiga fuafuaga faataatitia, ma o le fuafuaga ua aupito sili ona taua ua faaagaga mo nuu poo afio'aga. O le isi vaega o fuafuaga faataatitia ua faamoemoe lea mo le Vaega o Faigafaiva, o le a tuuina atu ai fautuaga ma fesoasoani aua le tapenaina o le faamoemoe ma e ao ona faamaonia e le Pule Sili Lagolago a le Vaega o Faigafaiva a le Matagaluga o Faatoaga ma Faigafaiva.

O le tausaga e **1988** na pasia aloaia ai le **Tulafono Autu o Faigafaiva** o loo faasaina ai le faia o faigafaiva-le-talafeagai i ogasami o Samoa. Peitai o nei tulafono uma e lei lausilafia e le toatele o le mamalu o le atunuu. Ua avea ai leni polokalame mo le fuafua tatau ma le vaaia lelei o i'a ma figota poo le faasao o le gataifale ma auala e faalauiloa ai nei tulafono ma fuafuaga a le Malo o Samoa mo le puipua o tamaoiga o le gataifale.

I le tausaga **1995** na pasia aloaia ai le **Tulafono Faatonutonu e faatapulaaaina ai le laiti o i'a ma figota**. O leni tulafono na pasia mo le faamoemoe e tuu avanoa ma fesoasoani i le faasaoina o i'a ma figota ua tauau ina mou atu. O le fua faatapulaaaina o le laiti o i'a ma figota e faataga mo le fagotaina ina ia ausia le lapopoa ina ia mafai ona tautuufua ma fanafanau e faatupulaia ai le faitau aofai o le tamaoiga o le gataifale. O loo faapipiina atu i le pito i tua o le Tusi Taiala se Pepa o Faamatalaga (6) mo le faamalamalamaina o leni tulafono.

O **Tulafono Laiti** a afio'aga ma alalafaga ua amanaia e le Faamasinoga. O se tasi lea o auala ua tuu sao ai e le Malo le malosiaga i afio'aga e mafai ai ona latou molia i le tulafono soo se tagata e le usitaia tulafono ua aiaia i totonu o le Tusi Taiala. O tulafono faa-le-nuu ua pasia i le Fono mamalu a Alii ma Faipule faatasi ma nisi tulafono sa fausiaina i faatalatalanoaga mo le puipua ole gataifale o le a tapenaina uma ma tuuina atu mo le pasiaina aloaia i lalo o **Tulafono Laiti o Faigafaiva** a le Malo o Samoa.

O le itu lelei o nei tulafono o le mafai lea ona aiaina e le Pule Mamalu a Alii ma Faipule o tagata uma aemaise i afioaga tuaoi, e puipui mai ai le fagotaina o le gataifale. O nei tulafono e laugatasia ai ma tagatanuu i faasalaga. O tulafono uma nei oloo tamauina i lalo o le vaega o Tulafono ma Faasalaga o le Tusi Taiala aua le fuafua tatau ma le vaaia lelei o le gataifale i tulaga o ona tamaoiga ma lona siosiomaga mo se lumanai manuia.

I taimi o faatalatalanoaga i vaega taitasi e tele ni mafuaaga sa fa'ailoa mai ae auga lava i le faafitauli ogaoga o le "**faaititia lea o i'a ma figota**" i le aloalo ma aua o le Afio'aga o Matatufu. O mafuaaga ma o latou aafiaga i le siosiomaga o le gataifale sa faapea ona iloiloaina ma sailia ai ma le tali o le faafitauli ma fofo e foi'a ai. E le gata i lea sa faailoa mai ai foi ma i latou e faatinoina nei galuga.

### **7.1**

#### **FAASAINA FAIGAFAlVA LE TALAFEAGAI**

##### **UPU TOMUA**

O nisi o faigafaiva le talafeagai na molimauina lona faaaogaina i aso ua mavae i totonu o le afioaga o fanaia, ava-niu-kini ma vailaau oona (chlorox ta-lavalava). O nei auala poo metotia faafaigafaiva na taatele

lona faaogaina e le au tautai a le atunuu i ia aso. Peitai i lenei vaitaimi i le alualu i luma o le iloa ma le silafia o tagata, ua mautinoa ai le le talafeagai o nei faigafaiva.

I faaiuga o suesuega na faatino i gataifale sa malosai ai le faaogaina o nei metotia faa-faigafaiva, ua faamaonia ai le tele o le amu ma le alititai e faaleagaina ai. E le gata la i le telē o se vaega o le gataifale e faaleagaina ae e mautinoa fo'i le tele o ni tausaga e tupu ai le amu ma toe o'o atu i le tulaga sa iai muamua.

Afai lava la ae faatino ai pea le faia o faigafaiva le talafeagai e aunoa ma se fuafua tatau i le lumanai, o lona uiga ua saosaoa le faaleagaina o le alititai ae e autausagā lona tuputupu ae faalenatura. Ua televave le faaleaga ae tuai ona toe tupu lauolaola a'e le alititai ma toe maua ai le tulaga sa iai muamua.

O le alititai o se vaega taua lea o le siosiomaga o le gataifale ona o i le nofoaga mo i'a ma figota laiti e lalafi mai ai i o latou fili. Afai e mamate amu, ua sosolo ai loa le limulimu ma faapea ona le toe nofoia e meaola laiti o le sami. O lona uiga o le a leai foi ni i'a ma figota lapopoa o le a feoi ai i lea vaega o le gataifale.

#### **FUAFUAGA FAATAATITIA A LE AFIOAGA**

Talu ai ona o le ogaoga o nei auala faa-faigafaiva i le siosiomaga (alititai) o le gataile, o lea ua finagalo autasi ai le pule mamalu a Alii ma Faipule o Matātufu e faamalosia pea le tulafono a le afioaga mai i aso ua mavae e faasaina ai faigafaiva le talafeagai.

1. Fanai'a (*Dynamites, explosives*)
2. Ava niu kini (*Derris Roots*)
3. Vailaau oona (*chlorox, bleach*)
4. Tu'iga, Faamo'a ma Sa'euga (*Coral smashing*)

O le puipuiga ma le faamalosia o lenei tulafono o le a i le faamalumaluga a Alii ma Faipule faatasi ai ma le lagolagosua a tagatanuu o le afioaga. O le faasalaga foi ua taua i lalo ua faamautuina lava e le komiti ma lo latou manatu ina ia mafai ona utagia e le afioaga.

#### **TULAFONO**

Ua matua faasaina faigafaiva-le-talafeagai e pei ona faailoa atu i luga ona toe faatinoina i gataifale o Matātufu.

#### **FAASALAGA**

O se tagata o le afioaga e solia lenei tulafono, o le a faasalaina i le \$500.00 S.T. poo le 50 aumatua.

#### **TULAFONO A LE MALO**

E pei ona faailoa atu i le Tulafono Autu Tau Faigafaiva (1988) a le Malo o Samoa, o faigafaiva le talafeagai ua faasaina ona toe faatinoina i gataifale o Samoa atoa. Afai ae molia ma faamaonia se solitulafono i faigafaiva le talafeagai, o le faasalaga e le sili atu ma le \$100,000.00 S.T. poo le 2 tausaga i le falepuipui. Peitai o le a fuafua lava e le Alii Faamasino se faasalaga talafeagai i le ogaoga o le solitulafono.

#### **GALUEGA FAATINO A LE OFISA O FAIGAFIIVA**

O le a fesoasoani le ofisa e faailoa atu nisi o faamatalaga ma faamaumauga taua e manaomia mo le molia o se tasi ua faatinoina faigafaiva le talafeagai. E galulue faapaaga le ofisa ma le afioaga i le faatinoina o ni suesuega ma le tapenaina o ripoti mo le molia o nisi e soliina lenei tulafono i luma o le faamasinoga.

## **7.2**

### **FAASAINA LE FAGOTAINA O I'A MA FIGOTA LAITI**

#### **UPU TOMUA**

O le fuafua tatau o le fagotaina mai o i'a ma figota o se itu lelei tele ma le talafegai lea mo le faasoina ma le toe faatupulaia o meaola o le gataifale. Olenei fuafuaga o le a mafai ona maua ai le avanoa e i'a ma figota laiti e tutupu ma fanafanau ai, i le uluai taimi ao lei aveeseina pe fagotaina mai foi.

Afai ae fagotaina mai se i'a poo o se figota ae lei o'o i le lapoa (matua) e fanafanau ai, o lona uiga ua leai sona sao mo le isi augatapulaga e sosoo ai. Afai la o le a faaauau ai pea lea tulaga o lona uiga o le a saga faaitiitia pea le faitauaofai o i'a ma figota ma faasolo ai lava ina mou malie ese atu.

#### **FUAFUAGA FAATAATITIA A LE AFIOAGA**

Ua faalia e le Pulega mamalu a Alii ma Faipule lo latou lagolagoina o le Tulafono Faatonutonu (1995) a le Malo o Samoa o loo faatapulaa mai ai le lapopoa talafeagai o i'a ma figota mo le fagotaina. Na taua foi o le faamalasia o lenei tulafono o le a iai pea lea i le Pule mamalu a Alii ma Faipule.

Ua lagolagoina foi e le Pule mamalu a Alii ma Faipule le pepa o faamatalaga o loo faaalia ai fua faatapulaa o le laiti o i'a ma figota.

#### **TULAFONO**

Ua matua faasaina lava ona toe fagotaina i'a ma figota laiti mai le gataifale o Matatufu e pei ona faaalia e le Tulafono Faatonutonu o Faigafaiva a le Malo.

#### **FAASALAGA**

O se tagata o le afioaga e solia lenei tulafono, o le a faasalaina i le \$200.00 S.T.

#### **TULAFONO A LE MALO**

O le Tulafono Faatonutonu (1995) o loo faamalasia ia Samoa atoa. O le mamafa o le faasalaga i le faamasinoga e o'o atu i le \$100,000.00 S.T. poo le 2 tausaga i le falepuipui. E fua le mamafa o le faasalaga i le ogaoga o le solitulafono.

#### **GALUEGA FAATINO A LE OFISA O FAIGAFIIVA**

O le a fesoasoani le ofisa e faailoa atu nisi o faamatalaga ma faamaumauga taua e manaomia mo le molia o se tasi ua faatinoina faigafaiva le talafeagai. E galulue faapaaga le ofisa ma le afioaga i le faatinoina o ni sutesuega ma le tapenaina o ripoti mo le moliaina o nisi e soliina lenei tulafono i luma o le faamasinoga.

## **7.3**

### **FAASAO O LE GATAIFALE**

#### **UPU TOMUA**

O se vaega o le gataifale ua faasaoina e tatau ona le toe aafia i ni faigafaiva. O le avea o se vaega o le gataifale ma vaega faasaoina o le a puipuia ai le siosiomaga atoa ai ma le faatumauina o nofoaga lelei mo i'a ma isi meaola o le sami. O lenei nofoaga o le a puipuia ai amu, aau ma togatogo, ma e maua ai le avanoa e tutupu ai i'a ia lapopoa ma mafai ai ona tautuufua. O le a faateleina le fuainumera faapea ma le faatupulaia o le lapopoa o i'a i vaega o le sami e faasaina ai fagotaga.

#### **FUAFUAGA FAATAATITIA**

O le afioaga o le a galulue faatasi ma le Vaega o Faigafaiva i le sutesueina o se vaega talafeagai o le gataifale mo le faasaoina. O le a feagai foi le afioaga ma le faailogaina (makaina) o tuaoi o le Faasao o le Gataifale ua filifilia.

O le a fausia foi e le afioaga ni Fale Leoleo ma faatinoina leoleoga e le Komiti aua le puipuia ma le mataituina o lenei nofoaga faasao.

#### **TULAFONO**

Ua matua faasaina soo se ituaiga faigafaiva ona faatinoina i le Faasao o le Gataifale o Matatufu. Ua matua faasaina foi ni taelega poo le uia o lenei Faasao o le Gataifale ua faailogaina (makaina).

#### **FAASALAGA**

Soo se tasi o le a soliaina lenei tulafono o le a faasalaina i le \$500.00 S.T. poo le 50 aumatua.

#### **FUAFUAGA FAATAATITIA A LE OFISA**

O le a suesue ma iloilo e le Vaega o Faigafaiva se vaega talafeagai o le gataifale e avea ma ogasami faasaoina. O le a saunia foi le ripoti ma tuuina aloaia i le Pule mamalu a Alii ma Faipule. O le a faia foi ni suesuega faavaitaimi e iloa ai le alualu i luma o le taulaumanuia o lenei atinae. O le a faatinoina foi ni aoaoga mo le mamalu o le afioaga i auala ma metotia faa-ona-po-nei mo le vaaia ma le mataituina o suiga i le faasao.

O le a fesoasoani le ofisa i le tapenaina o lenei tulafono ma isi i totonu o lenei Tusi Taiala mo le avea ma Tulafono Laiti o le afioaga o Matatufu. O Tulafono Laiti ae pasiaina o le a amanaiaina i totonu o le Faamasinoga a le Malo.

## **7.4**

### **FAASAINA LAMA MOLI UILA**

#### **UPU TOMUA**

O le faaaogaina o moli uila i faigafaiva ua molimauina le tele o i'a ma figota e mafai ona fagotaina mai ai. Ua iai le talitonuga o le a o'o atu i se tulaga faaletonu i'a ma figota maua o le gataifale pe a faaauaina pea ona faaaogaina nei ituaiga o mea fagota. O le a o'o ai ina faaititia i'a ma figota e mafai ona o'o atu lo latou lapopoa e maua ai le avanoa e tautuufua ma fanafanau ai.

#### **FUAFUAGA FAATAATITIA A LE AFIOAGA**

Na faaalua e le Pule mamalu a Alii ma Faipule e faapea, e faatagaina le faia o lama moli uila i soo se vaega o le gataifale o le afioaga seia vagana ai totonu o le ogasami ua faailoiloina mo le faasao. O lea fuafuaga ua auautasi iai finagalo o le Pule mamalu a Alii ma Faipule ina ia mafai ona pulea tatau, puipuia ma vaaia lelei le tamaoaiga o le gataifale ma lona faaaogaina.

#### **TULAFONO**

Ua matua faasaina lava ona toe faaaogaina le lama moli uila (i le po) i totonu o le ogasami faasaoina mo i'a ma figota.

#### **FAASALAGA**

O se tagata o le afioaga e solia lenei tulafono, o le a faasalaina i le \$500.00 S.T. poo le 50 aumatua.

#### **FUAFUAGA FAATAATITIA A LE OFISA O FAIGAFAlVA**

O le a fesoasoani le ofisa i le tapenaina o lenei tulafono ma isi i totonu o lenei Tusi Taiala mo le avea ma Tulafono Laiti o le afioaga o Matatufu. O Tulafono Laiti ae pasiaina o le a amanaiaina i totonu o le Faamasinoga a le Malo.

## **7.5**

### **FAASAINA FAIGAFAlVA MAI I ISI AFIOAGA**

#### **UPU TOMUA**

O fagotaga mai isi afioaga e faaaogaina ai faigafaiva e le talafeagai e iai ava niukini ma vailaau oona ua mautinoa le matua faaleagaina ai o le siosiomaga o le gataifale. O le isi tulaga e tulai mai i faigafaiva mai isi afioaga o le faaleagaina lea o amu ma le alititai. E faapea upu a le atunuu 'E manumanu le suli ia i ana mea faasuli' ma o se talitonuga fo'i lea i le tulaga o loo iai i le afioaga. E manumanu lava le au tautai o le afioaga i le lelei o le gataifale ma lona tamaoaiga ona o se mea totino e faasino tonu i le afioaga. Peitai e le mautinoa lea tulaga i tautai mai i isi afioaga.

Ua le gata i lea, a ua faaititia ai foi i'a ma figota o loo manaomia e tagata o le afioaga mo le fofoga taumafa.

#### **FUAFUAGA FAATAATITIA A LE AFIOAGA**

Ua faaalua mai e le Pule mamalu a Alii ma Faipule le tatau ona faia o se tulafono e faasaina ai faigafaiva mai isi afioaga ona o loo masalomia le faaaogaina ai lama moli uila, ma isi faigafaiva le talafeagai.

**TULAFONO**

Ua matua faasaina lava tagata mai i isi afioaga ona toe fagotaina gataifale o Matatufu e faaogaina ai faigafaiva le talafeagai ma isi lava ituaiga o faigafaiva.

**FAASALAGA**

O se tagata o le afioaga e solia lenei tulafono, o le a molia i le Tulafono a le Malo

**GALUEGA FAATINO A LE OFISA O FAIGAFAIVA**

O le a fesoasoani le ofisa i le tapenaina o lenei tulafono ma isi i totonu o lenei Tusi Taiala mo le avea ma Tulafono Laiti o le afioaga o Matatufu. O Tulafono Laiti ae pasiaina o le a amanaiaina i totonu o le Faamasinoga a le Malo.

## 7.6

### FAASAINA LE LAUINA O LE ONEONE

**UPU TOMUA**

O le lauina ese o le oneone o se gaioiga ogaoga i le siosiomaga o le gataifale. O nisi o mafuaga e aofia ai le faatupulaia o eleele tafia (soil erosion) ma faapea ona nefu ai le siosiomaga o le gataifale. O le malosi faa-natura o galu o le sami, matagi ma tafega mai i lafanua o le a fesoasoani i le aia ma le tafia ese o le matafaga. O se vaega tele e tafia atu i le aloalo ma faaitiitia ai le loloto o le sami ma le malosi o le la e susulu atu ma feola ai amu ma isi meaola o le sami.

O palapala tafia latou te faaleagaina totoga ma manunu'a ai fuilauvi o i'a ma iu ai ina mamate pe alofia foi lea ogasami.

**FUAFUAGA FAATAATITIA A LE AFIOAGA**

Na faaalua e Alii ma Faipule o Matatufu, o le lauina o le oneone mai le matafaga o se tasi lea o mafuaaga ua faaitiitia ai i'a ma figota. O lea ua autasi ai se finagalo ina ia faasaina le toe faia o lea tulaga ona e faaleagaina ai le gataifale.

**TULAFONO**

Ua matua faasaina lava tagata ona toe lauina le oneone o le matafaga o Matatufu.

**FAASALAGA**

O le a iai pea i le Fono mamalu a Alii ma Faipule o Matatufu se faasalaga talafeagai pe a solia e se tasi lenei tulafono.

**GALUEGA FAATINO A LE OFISA O FAIGAFAIVA**

O le'a fesoasoani le ofisa i le tapenaina o lenei tulafono ma isi i totonu o lenei Tusi Taiala mo le avea ma Tulafono Laiti o le afioaga o Matatufu. O Tulafono Laiti ae pasiaina o le a amanaiaina i totonu o le Faamasinoga a le Malo.

## 7.7

### FAASAOINA O TOGATOGO

**UPU TOMUA**

O togatogo o ni laau e taua ma aoga tele ma ua avea o ni lafitaga ma nofoaga ma le punaaga o meaai mo le tele o i'a ma figota o le gataifale. O i'a lapopoa e agai ma nonofo i togatogo ma avea ai lenei nofoaga e tautuufua ma fananau ai. A tanumia pe taina i lalo ma faaleagaina togatogo ua mautinoa o le a faaitiitia i'a ma figota mo tupulaga o le lumanai.

**FAUTUAGA A ALII MA FAIPULE**

Ua fautuaina e le Pulega mamalu a Alii ma Faipule le faasaoina o togatogo ona o le tele o le tamaoaiga o le gataifale o loo avea lea vaega ma nofoaga e aumau ai. Ua faamalosia foi e le afioaga le toe totoina o ni togo fou aua le taofia o le palapala tafia atu i le gataifale.

#### **FUAFUAGA FAATAATITIA A LE OFISA**

Ua saunia e le Vaega o Faigafaiva pepa o faamatalaga o loo faailoa ai itu taua o togatogo aemaise o lona sao i le faaleleia ma le faateleina o le tamaoaiga o le gataifale ma le siosiomaga.

## **7.8**

### **IA ILOILOINA TULAGA TALAFEAGAI O LE GATAIFALE MO LE TUFAINA ATU MA LE FAATOAGAINA O FIGOTA MA I'A.**

#### **UPU TOMUA**

O le tufaina atu ua faatatau lea i le talafeagai o vaega moomia mo le faaolaina o i'a ma figota. O nisi nei o atinae mo le faateleina o figota ma i'a aua le fofoga taumafa mo le afio'aga. O nei auala faa-atinae e moomia ai lava le galulue filiga ma le faamaoni o le afio'aga ina ia ausia se taunuuga lelei.

#### **FAAMATALAGA FAAOPO'OPO --- TUFAINA O FIGOTA/I'A**

O le tufaina atu ua faatatauina lea i le aumaia o ni figota/i'a mai se isi atunuu e faaolaina i se ogasami/vai ua talafeagai lelei. O le tufaina o le figota o le aliao i le tele o atunuu o le Pasefika ua mautinoa ai le tele o ni faamanuiaga na mafai ona seleseleina e nei atunuu.

I Fiti ua tele ina faaaogaina ma toomaga iai tagata i le aano o le aliao e avea ma mea taumafa. O lona atigi na mafai ona faatauina atu e gaosi ai faamau o ofu i fale gaosi oloa. I le Atu Kuki e tusa ma le 280 aliao na tufaina atu iai ma na mafai ona maua mai ai se aofaiga e tusa ma le 200 tone o atigi aliao i le tausaga na faatauina i fale gaosi faamau.

I le taimi nei o loo iai taumafaiga a le Vaega o Faigafaiva i le faafofoaina o faisua, tapumiti (tuitui) ma aliao lapo'a e ese mai le aliao Samoa, mo le faa-faatoagaina i gataifale o le atunuu. O nei figota ua mautinoa lo latou faaitiitia talu ai o le soona fagotaina e le gata i lea o faigafaiva le talafeagai ma mala faa-le-natura ua faatamaia ai o latou nofoaga. O le faamoemoe la o lenei taumafaiga o le faa-faatoagaina lea o nei figota i vaega o le gataifale ina ia toe faatupulaia ai.

#### **FUAFUAGA FAATAATITIA A LE AFIO'AGA**

E ao i le afio'aga ona:

- Galulue faatasi ma le Vaega o Faigafaiva i le faatinoina o le iloiloga pe talafeagai ma lelei le gataifale ma le vai (pe a iai se vai o le afio'aga) i le tufaina atu ma le faafaatoagaina o figota/i'a
- Auiliiliina o le lipoti i suesuega o le talafeagai o le gataifale ma le vai, ma ia faia se faaiuga i le faatinoina o nei atinae i totonu o Matatufu
- Galulue faatasi mo le puipuia o nei atinae ma le va'aia o tagata o lo'o latou faatamaia ma solia tulafono e faatatau i nei atina'e.

#### **FUAFUAGA FAATAATITIA A LE OFISA O FAIGAFIIVA:**

O le a faatinoina ni su'esu'ega i le gataifale ma le vai o le afio'aga ina ia faamaonia le talafeagai mo le faaolaina ai o figota/i'a. O le a mafai ona tuuina atu ni figota/i'a pe afai o le a faamaonia le talafeagai o nei nofoaga mo ia atina'e.

#### **PE A FAATAUNUINA LENEI FUAFUAGA**

O le a;

- Fesoasoani mai le Ofisa e ala lea i le va'aia ma le mata'ituina o le sologa lelei o le tuputupu a'e o figota/i'a ua atina'eina.
- Saunia ni aoaoga mo le faamalamalamaina o olaga faanatura ma le tausiga o nei figota/i'a.

## 7.9

### IA FA'AAOGAINA LE MANA O TALOSAGA!

#### OTOOTOGA

O talosaga ma talitonuga tuufaatasi faa-le-lotu, o se tasi lea o faamoemoega ua talitonuina lona taua aua le puipuia ma le faasaogalemuina o le gataifale ma ona tamaoiga aemaise o lona siosiomaga. Ua mae'a foi ona faia se fuafuaga a le Malo i le faia o le vaiaso mo tatalo ma anapogi e talosia ai lo tatou atunuu ina ia mamao ni mala faa-le-natura ona aafia ai tatou ma lo tatou siosiomaga. Peitai o se taunuuga lelei o nei fuafuaga e faamoemoe lea ia i tatou mo le faamamaluina o lenei vaiaso e tasi e tuu atoa ai o tatou agaga ma loto e talosia ai o tatou laufanua, gataifale ma lo tatou siosiomaga atoa ina ia lauolaola ma manuia mo i tatou nei aemaise o fanau o le lumanai.

#### FUAFUAGA FAATAATITIA A LE AFIO'AGA

O le sao taua o le au-failotu, o le unaia lea ma faamalosiau i tagatanuu ina ia latou faatauaina le puipuia ma le faasoina o le gataifale ma ona tamaoiga.

O le tuufaatasia o finagalo o tagata ina ia galulue faatasi e foia ai foi faafitauli o loo alia'e mai i le gataifale. Ua lagolagoina foi e le Komiti lenei fautuaga ma fautuaina ai le galulue faatasi o le aufailotu ma le mamalu o le afio'aga.

#### FUAFUAGA FAATAATITIA A LE OFISA O FAIGAFAIVA

O le a mafai ona tuuina atu ni fesoasoani mai le Ofisa mo le mamalu o le au-fai lotu e ala i pepa o Faamatalaga ma Tautalaga ina ia fesoasoani i le tapenaina o a latou lauga ma aoaoga mo le puipuia ma le faasoina o le siosiomaga o le gataifale ma ona tamaoiga.

## 7.10

### TALOSAGA

O nei talosaga sa mafai ona tuuina mai e le Pule mamalu a Alii ma Faipule i taimi o fonotaga. O talosaga ua tuuina mai sa faamautuina e le Komiti (KFVL) i le latou fonotaga ma le Ofisa

O le tufaina atu o figota ma i'a ua faatalosagaina e fuafua lelei i le talafeagai o le gataifale i le maea ai o le suesuega. E faaalua le talafeagai o le gataifale i se ripoti e tuuina mai e le vaega su'esu'e o loo nafa ma galuega nei a le Vaega o Faigafaiva. O le a faamaonia uma e le Alii Pule Sili Lagolago soo se talosaga e tuuina mai.

O talosaga uma sa faailoa mai e aofia ai;

- (a). Ogasami faasao mo i'a ma figota
- (e). Tilapia.
- (i). Faisua.
- (o). Aliao

## 7.11

### MALILIEGA

Ua i ai le maliliega o le a galulue so'oso'o tauau uma vaega i le puipuiga o le siosiomaga o le gataifale mo le manuia o tagatanuu o le afio'aga aemaise o tupulaga o le lumanai. O lea manuia e mafai ona maua pe a faatinoina uma fuafuaga faataatitia ua tamauina i le Tusi Taiala poo le Fuafuaga Tatau mo le Pulea ma le Vaaia lelei o i'a ma figota o le afio'aga.

## 7.12

### TOE ILOILOINA O LE TUSI TAIALA

#### UPU TOMUA

O le toe iloiloina o lenei Tusi Taiala a le afio'aga e sailia ai le agai i luma o le polokalame i totonu o nuu ma afio'aga, aemaise se auiliiliga maumaututu i le tulai mai o galuega fai a le afio'aga ma le Vaega o Faigafaiva i le faataunuaina o fuafuaga faataatitia e pei ona taua i luga. O lenei foi iloiloga e lipotia ai le alualu lelei ma ni faaletonu i totonu o le Polokalame talu ona faavaeina i totonu o le afio'aga. E le gata i lea o ni vaega e fia faia iai ni suiga fou e pei o le toe teuteuina o tulafono ma le faamautuina o matafaioi a itu uma o le polokalame.

#### Fuafuaga faataatitia a le Afio'aga ma le Ofisa o Faigafaiva

Ua i ai le maliliega a le Komiti (KFVL) a le afio'aga ma le Vaega o Faigafaiva o le a toe auiliiliina lenei Tusi Taiala pe a maea le ono (6) masina talu ona pasia lenei tusi i le Fono Tele. O le a feutaga'i lava le Vaega o Faigafaiva ma le Tofi o le afio'aga ma le Komiti i se aso o le a atofaina pe a atoa le ono (6) masina.

## 7.13

### UPU MULIMULI

O le auai o le afio'aga o Matatufu i le Polokalame mo le Pulea ma le Vaia Lelei o l' a ma Figota ua mautinoa le manuia ole afio'aga i ni tausaga o i luma. O le taulau manuia lenei polokalame e faalagolago tele i le galulue faatasi o le afio'aga (Pule Mamalu a Alii ma Faipule, Komiti a Tina, Aumaga) ma le Ofisa o Faigafaiva.

O lenei polokalame o se galuega e umi se taimi e faaatali ai ni tali faaaliali ma sona lelei, o lea e taua ai mo le silafia e tagatanuu o le afio'aga. O i latou o le a talisapaia ma aeae i nei manuia o tupulaga o le lumanai o le afio'aga. O lea ua a'e ai se tofa i le Afio'aga e faia se polokalame fa'apenei a le Ofisa o Faigafaiva e fesoasoani ai e toe tapu'e mai le sosia o le tamaoaiga o le gataifale o le afio'aga ua tauau ina mou atu.



**Faamatalaga e uiga i le afio'aga.**

## **8 Faamatalaga 1 - Faamatalaga e uiga i le afio'aga o MATATUFU.**

### **1. Faitau aofai o tagata.**

Aofaiga o matai, faletua, tausī, aualuma, aumaga, alo ma fanau - 700

### **2. Ituaiga o Ekalesia**

EFKS

Asofitu

Faapotopotoga a Le Atua

Katoliko

### **3. Aoga**

Tulaga Lua

Aoga Faataitai

### **4. Siosiomaga o le gataifale.**

Umi o le aau

> 200 mita

Mamao o le aau ma le matafaga

150 mita

Loloto o le vaega aupito sili ona loloto o le aloalo pe a pe le tai

3 futu

Loloto o le vaega aupito sili ona loloto o le aloalo pe a sua le tai

6 futu

Papa'u o le vaega aupito sili ona papa'u o le aloalo pe a pe le tai

1 futu

Papa'u o le vaega aupito sili ona papa'u o le aloalo pe a sua le tai

6 futu

### **5. Nisi Faamatalaga**

➤ Toatele o le afio'aga ua aumau i atunu'u mamao - Ioe

➤ Maopoopo faiganu'u i Alii ma Faipule, Aumaga ma le Komiti a Tina ma Tamaita'i - Ioe

## 9 Faamatalaga 2: Ituaiga Faigafaiva e fa'atinoina i aso uma

Ituaiga	Taimi fa'aalu (tasi/ova ma le tasi le aso i le vaiaso)	O ai e masani ona fa'atinoina nei faigafaiva			O le fa'aaogaina o i'a/figota maua		
		Ali'i	Tama'ita'i	Tamaiti	'Aiga	Fa'atau	'Aiga/Fa'atau
Maulu & matatao	2 itula	√			√		
Ofe	2 itula	√			√		
Upega	2 itula	√			√	√	√
Matau Filoa	2 itula	√			√	√	√
Aoina o figota	2 itula	√	√		√		
<b>Nisi Fa'amatalaga</b> <ul style="list-style-type: none"> <li>❖ Faigafaiva ua fa'asaina – 'ava niukini, fanai'a, tu'iga/fa'amo'a, tane maulu</li> <li>❖ Fa'asaina foi tagata mai isi afio'aga ona fagotaina gataifale o Matatufu se'i vagana ua feutaga'i ma le Komiti (KFVL).</li> </ul>							

## 10 Fa'amatalaga 3: I'a ma Figota

Ituaiga i'a	Ituaiga faigafaiva	Taimi fa'aalu i fagotaga	
		Taimi nei	30 tausaga
Lo	Matatao	2 itula	½ itula
Pone	Matatao/lama	2 itula	½ itula
Mata'eleele	Upega/lama/matau	2 itula	½ itula
Ta'uleia	Lama/matatao	2 itula	½ itula
Malau	Uaua/lama/upega	2 itula	½ itula
Lalafi	Lama/matau	2 itula	½ itula
Fugausi	Lama	2 itula	½ itula
<b>Ituaiga figota</b>			
Alili lapo'a	Aoina	2 itula	½ itula
Faisua	Fasi faisua	2 itula	½ itula
Tuitui	Aoina	2 itula	½ itula
vaga	aoina	2 itula	½ itula

Nisi fa'amatalaga:

- ❖ Nofoaga fa'asao: O le a Fuafuaina.

## **11 Fa'amatalaga 4: Tulafono a le Afio'aga i le puipuiga o le gataifale**

O tulafono ua taua i lalo ua mata'ituina e le afio'aga mo le puipuiga o tamaoiga ma le siosiomaga o le gataifale.

1. Ituaiga faigafaiva ua fa'asa ona toe fa'atinoina i gataifale o Matatufu
  - ❖ 'ava niu kini
  - ❖ Fanai'a
  - ❖ Lama moliuila mai isi nuu
  - ❖ Vailaau oona (Chlorox)
2. O tagata faifaiva mai isi afio'aga ua matua faasaina lava ona toe faatinoina se faigafaiva i gataifale ma le ogasami faasaoina o le afio'aga o Matatufu.

## **12 Fa'amatalaga 5: Fa'amatalaga ma fa'amaumauga sa aoina i taimi o fa'atalatalanoaga i vaega.**

Ta'ita'i fa'atalatalanoaga: Tauaefa, Tafatoa, Fuatino  
Fesoasoani ma fa'amaumau faamatalaga: Sefulu, Vaonila, Aifiti  
Aso na faia ai: 06/02/2007.

**AUTU: "PUIPUIGA O LE SI'OSI'OMAGA O LE GATAIFALE"**

**‘Aafiaga:**

- Faaitiitia taumafa sami
- Tele le taimi fa’aalu i fagotaga
- Aafia le soifua maloloina
- Faaitiitia tupe maua mai tau’i’a faatau atu

**Faafitauli:** Faaitiitia i’a ma figota laiti i gataifale o Matatufu

**Mafuaaga:**

- Tau leai ni amu ola
- Mala faa-natura ( matagi/afa/lologa/galu ma isi)
- Faigafaiva le talafeagai (fanai’a/ava niukini)
- Faiva e pei o fa’amo’a ma upega tu’iga

**TALI FA’AFITAU LI:** Fa’ateleina i’a ma figota i le gataifale o Matatufu

**Fofu o Mafuaaga:**

- Faateleina o amu ola/faasao le amu
- Mana o talosaga e talosia ai le siosiomaga o le gataifale
- Faasa faigafaiva le talafeagai (fanai’a/ava niukini)
- Faasa fa’amo’a ma tu’iga
- Aoina alamea

**Fa’atinoga: (E faapefea ona fa’atino?)**

- Fa’asao amu e ala i le faia o se Ogasami Fa’asao
- Faamamaluina le vaiaso o tatalo ma anapogi a le Malo
- Faia tulafono e fa’asaina ai faigafaiva le talafeagai
- Faia ni polokalame e unaia ma faamalosia ai faiva i tuaau
- Faia ni fautuaga ina ia aoina mai i uta alamea pe a vaaia i taimi o fagotaga

**O ai e faatinoina:**

- Pulega a Alii ma Faipule
- Faletua ma Tausi
- Aumaga ma tagatanu’u uma
- Vaega o Faigafaiva (sui o le Malo)

**Talosaga a le afio’aga:**

- Nofoaga fa’asaoina mo i’a ma figota
- Fa’a-fa’atoagaina o le faisua, ‘aliao ma isi figota
- Fa’alateleina le tomai i nisi o agavaa faa-faifaiva

## **13 Fa'amatalaga 6: Sui o le afio'aga sa auai i faatalatalanoaga**

### ***Matai:***

- |                              |                       |
|------------------------------|-----------------------|
| 1. Tuva'amalefoe Saliu       | 8. Manū Limasene      |
| 2. Tauiliili Etuale          | 9. Tafaomaalii Ropati |
| 3. Leuea Iulio (Pulenuu)     | 10. Tamausu Iva       |
| 4. Apisala Sili              | 11. Asiasiau Malo     |
| 5. Moiloava Seti             | 12. Tafea Simone      |
| 6. Su'atapulolo'o Aukusitino | 13. Potaua Alofaifo   |
| 7. Saua Avia Faatili         | 14. Faatili Muavaa    |

### ***Komiti a Tina:***

- |                     |                     |
|---------------------|---------------------|
| 1. Elisapeta Luteru | 4. Leilea Talina    |
| 2. Rosa Leuea       | 5. Seneuefa Mikaele |
| 3. Sapina Timaloa   |                     |

### ***Aumaga:***

- |                      |                   |
|----------------------|-------------------|
| 1. Ioelu Satuu'u     | 3. Sione Su'atino |
| 2. Taumaloto Logovii | 4. Iese Alia      |

### **Suafa o le Komiti mo le Vaaia lelei o i'a ma figota (KFVL)**

#### ***Matai:***

- |                              |                          |
|------------------------------|--------------------------|
| 1. Saua Avia Faatili         | 5. Potaua Alofaifo       |
| 2. Asiasiau Malo             | 6. Leuea Iulio (Pulenuu) |
| 3. Tafaomaalii Ropati        | 7. Manū Limasene         |
| 4. Su'atapulolo'o Aukusitino | 8. Moiloava Seti         |

### **Sui o le Vaega o Faigafaiva a le Matagaluega o Faatoaga ma Faigafaiva a le Malo Samoa**

Mulipola Taupau A. Mulipola (Pule Sili Lagolago)  
Iumalo Pouvave Fainuulelei (Alii Ofisa Sinia Maualuga)  
Tauaefa Autalavou Taua (Alii Ofisa Sinia)  
Fuatino Ulusapeti Tiitii (Tamaitai Ofisa Sinia)  
Tafatoa Ferron Fruean (Alii Ofisa)  
Vaonila Falanai (Tamaitai Ofisa lagolago)  
Aifiti Viane (Tamaitai Ofisa lagolago)  
Sefulu Leleimalefaga (Alii Ofisa lagolago)